



1

玄覽序

國朝諸侯王寵以名位唯得衣食租稅  
不與政事英俊賢豪之士困於令甲摧  
眉抑首往々而然須計臣題覆雖著試  
吏之條未覩赫然

明命當事者依違既久壅塞不行故肺  
附之臣思自表見於世者僅造作文辭  
冀託空言以垂不朽若吾豫章列侯是





已豫章自獻王始封首倡文教著述  
之富汗竹盈箱遺烈至今詠頌不絕後  
嗣承序代有聞人然皆奮藻騰觚函宮  
吐角未有弘績丕緒昌大其業如鬱儀  
君侯者也君侯資識淵茂道術通明為  
人精忠簡易庶靖寡欲不交接世俗獨  
程才於今古下帷讀書日記萬餘言溥  
覽冥搜寒暑忘倦非問寢侍膳手不釋  
編無臺囿鳥獸之觀聲伎管絃之好嘗  
以載籍浩汗緡閱為煩目想心存畋鮒  
要妙鉛黃數易緡素屢更著書十篇題  
曰玄覽凡緯象方輿古今靈異精微變  
怪草木禽虫金玉鐘鼎夷荒遐迹之說  
靡不鈎深析微探頤索隱事以類從文  
以藻飾價重圭璧字扶風霜誠書圃之  
指南詞鋒之赤羽也昔劉向之辨盜械



竇攸之對鼯鼠時人咸服其博今觀此  
書有不為之矍然失容者乎願君侯近  
奉  
璽書錫之駝章緹綬持國秉矣通親之  
表行且遠之

當宁則此書自當獻御於

上蓋將副石渠延閣以張大公族人文  
之盛無令淮南東阿之輩得專媿於曩

代也

萬曆甲午歲仲夏月仝社彞會次嘉甫  
撰

社中雲間沈紹文孺休甫書



玄覽序

今葉文運中天家鉛戶槩豈不蒸上稱  
盛哉大都纈采含英標華忘實人上言  
之而人上不知其委是為擊輦又或管  
斑脗鼎振襟肘出如窶子說金竟為懸  
想是謂羔袖間者炙轂雕龍天頭馬角  
核之實用靡有指歸是謂飾羽此皆襲  
號扶蘓耳假其名適足以亂天下矧曰

懸書國門此輓近世士尊耳目而冥搜  
綜核者實鮮其人也玄覽者鬱儀宗侯  
之所裒次上下凡若干卷宗侯於學無  
所不窺下帷幾十季馳驟數千載籍汰  
繁黜詭爰有是編闡天地運行之秘通  
夷夏風氣之宜程民用物力之則極蠕  
動萌育之目靡不尋流導源析歸根始  
闕之善倒淵客之舟而游五都之肆觸  
目球琅應接不暇裒然實學矣夫梁孝  
劉安兩賢王也兔園之簡授之郗枚輩  
即鴻寶字換風霜亦八公之徒相與潤  
色蓋彼志在噉名不嫌攘善英雄欺人  
耳孰有嘔心化蠹退筆成家躬韋布研  
討之業如宗侯者洵詞垣之元鑑而藝  
圃之武庫也祇今

聖主右文宗正條方在議通以宗侯博



識使之委蛇石渠天祿之間黼黻  
皇猷用備顧問即太乙之藜當為掩色  
亦旦暮遇之耳宗侯精易學著有駢雅  
業已梓行於世此未足以盡宗侯也  
萬曆甲午歲孟春吉臨海社弟王士昌  
撰

玄覽目錄

- 象緯篇第一
- 輿地篇第二
- 古今篇第三
- 靈異篇第四
- 精微篇第五
- 金玉篇第六
- 草木篇第七
- 禽蟲篇第八
- 變恠篇第九



夷荒篇第十

玄覽卷之一

象緯篇

豫章朱謀埠鬱儀甫著



天體廣經二億三萬三千五百里七十有五步  
東西短四步周六億十萬七百里二十有五步  
自地至天一億一萬六千七百八十六里半下  
地之厚與天之高等日月廣徑千里周三之大  
星徑百里中星五十里小星三十里北斗七衡  
六間相距九千里三垣二十八宿中外常明之  
星百二十有四可明之星三百二十爲星二千



五百海人之占未存焉微星之數蓋萬一千五百有二十

凡日月運行四極之道極下者其地高人所居六萬里滂沱四隕而下天之中央亦高四旁六萬里日光所照徑八十一萬里周二百四十三萬里日行四極代爲晝夜北方日中南方則夜之半也東方日中西方則夜之半也

陰陽之氣上薄爲雨下薄爲霧噫而爲風相激而爲雷電嚴寒之雨因風相襲而爲雪上燠下寒其雨爲霰陰氣暴上其雨爲雹地之暄氣爲露寒氣爲霜陽炙陰而爲虹霓春風上升秋風下降夏風橫行冬風著土而吼穴風之高者其道遠風之下者其道近不鳴葉者十里風也鳴條搖枝者百里風也搖大枝者五百里仆大木者千里折大木者五千里一日一夕者萬里二日夕者天下半風三日三夕天下盡風

日旁之氣向內爲抱向外爲背周而爲暈刺日爲僑小而在日左右爲珥小而交於日下爲纓抱而立于日上爲冠直而立于日上爲戴長而斜倚于日旁爲戟凡日旁一珥軍喜二珥民壽



三珥后喜四珥立侯王及子孫之喜冠爲封建  
暈珥爲忿爭背爲叛日暈欲得五色者有喜青  
暈五穀豐紫暈大旱亦有外夷入貢黑暈天下  
兵白暈當日多雨赤暈國內有災赤暈三重大  
旱千里七日不解者天下疫紅暈二重者儲君  
生也白暈二重者宮車晚出或其月多風碧暈  
三重五穀半傷四重米價十倍綠暈二重百日  
內有大赦若三重者大雨不絕日暈五重魚行  
人道日暈七重天下離心日暈不市而半暈者  
在東東軍勝在西西軍勝在南北亦如之

晝而日紫赤夜而月白皆將雨也晝而日黃白  
夜而月赤將旱且風也晝而日青夜而月綠將  
寒之候也晝而日黑夜而月青將雨不雨變爲  
雲霧暈背虹蜺也白虹者百殃之本衆亂所基  
也霧者衆邪之氣陰來冒陽也凡夜霧白虹見  
者臣有憂晝霧白虹見者君有憂虹首尾至地  
流血之象也凡霧氣四塞百步不見人名曰晝  
昏不有破國必有滅門山中冬霧十日不解者  
山欲崩也冬至後一霧水一尺

山雲草莽水雲魚鱗旱雲煙火泔雲水波海旁



蜃氣象樓臺廣野之氣成宮闕北夷之氣如牛  
羊羣畜穹閭南夷之氣如閣臺或類舟船幡旗  
東夷之氣如樹西夷之氣如室屋自華以南其  
氣下黑上赤嵩高三河之郊氣正赤恒山之北  
氣青勃碣海岱之間氣正黑江湖之間氣白東  
海氣如圓簷附漢河水氣如引布江漢氣勁如  
杼濟水氣如黑狔滑水氣如狼而白尾淮南氣  
如帛少室氣如白兔而青尾恒山氣如黑牛而  
青尾凡喜氣上黃下白怒氣上下赤憂氣上下  
黑土功氣黃白徙氣白百人以上皆能有氣也  
凡軍上之氣高勝下厚勝薄實勝虛長勝短澤  
勝枯凡候氣之法仰瞻中天則百里內也舉目  
而望則五百里平視則千里在桑榆上高五六  
尺者千五百里外也平望桑榆間二千里登高  
而望下屬地者三千里

凡候雨以晦朔弦望雲漢四塞者皆當雨也暴  
有黑氣如覆船于日下或黑雲如牛羸或有異  
雲如水牛不出三日大雨矣黑雲如羣羊奔如  
飛鳥五日必雨北斗獨有黑雲覆之或蒼黑雲  
細如杼軸蔽日月不五日必雨有雲如兩人提



鼓持桴或如浮船皆當暴雨河有黑雲如船或如匹布維河不出十日大雨四方有躍魚雲游而疾者當日雨遊而遲者雨少難至雲甚潤而厚者大雨暴至

填星墜海水溢黃星騁海水躍咸池明有死龍客入屏四足病恒星匿王政失星動搖民將勞流入紫宮天下鞠凶枉矢所觸天下共伐天紀絕而地震山崩焉房星坼而地動河清焉星之所墜下有戰場凡國有兵凶則星墜爲鳥獸天下將季則星墜爲飛蟲天下大兵則星墜爲金鐵天下有水則星墜爲土國主亡則星墜爲草木兵起國主亡則星墜爲沙國有大喪則星墜爲龍

五星失次變而爲妖星其出之方不過三年必有破國屠城焉餘殃不盡必爲水旱疾疫凡妖星出見長者大者災深而期遠短小者災淺而期近三尺至五尺者期百日至一丈者期一年至三丈者期三年至五丈者期五年至十丈者期七年十丈以上者期九年凡彗體无光傳日而光夕見則東指晨見則西指在日南北皆隨



日光而指偏指曰彗芒氣四出口字

月暈五色後宮有喜月暈五重是謂陰盛不宜  
于君月暈北斗天王福究月暈而珥六旬兵起  
月食既大臣死月生齒篡臣起月有足主淫泆  
兩月並見大臣謀主三月重現天下大災魚鳥  
食人月三珥者大臣有喜冠而復暈天下有喜  
月犯歲星國饑人流犯熒惑貴臣死大將亡犯  
太白君憂兵發月食填星流民千里月犯箕糴  
大貴犯畢有變令犯房天王有憂四足之蟲多  
死凡月與五星入輿鬼者大臣誅

火守南斗五穀不成火入天困天下大饑火犯  
輿鬼東北星者魚鹽大貴金入氐春糴貴木守  
虛主大饑金守井五穀不成金守氐國君大哭  
八穀星不見國人糊口天市暗物騰踊箕移入  
河國人相食客星守瓠瓜魚鹽貴水星守氐天  
下大旱水見翼多火災

歲星三百九十九日而一周天熒惑七百八十  
日而一周天填星三百七十八日而一周天太  
白五百八十四日而順逆兩合辰星一百一十  
六日而順逆兩合五緯各有盈縮之變視日遠



近以爲遲疾歲星距日十三度而晨見火距日十九度而晨見土距日十八度半而晨見金距日十度半而始見水距日十六度而始見

日月五星爲七政羅喉計都月孛紫氣爲四餘羅計生于月交黃道之始中月孛生于月之盈縮紫氣生于閏餘天爲赤道三百六十五度二千五百六十二分日爲黃道不及天一百三十七分謂之歲差積七十三歲天與日相差一度唐虞時冬至日在玄枵虛六度今上萬曆癸巳冬至日在析木箕三度

十二月節日躔宿度立春虛初度昏婁中日房中驚蟄室七度昏畢中日尾中清明奎九度昏井中日斗中立夏胃九度昏張中日牛中芒種畢十二度昏翼中日虛危中小暑井十三度昏角中日室中秋柳十度昏氐房中日婁中白露翼二度昏尾中日畢中寒露軫十二度昏斗中日井中立冬氐三度昏牛中日星中大雪尾六度昏虛危中日翼中小寒斗十一度昏室壁中日角亢中

以斗杓所建辨十二月之節以北極所止定天



中以土圭測景定地中古於洛之陽城建八尺之臬冬夏日至測景實六百里而差一寸自洛而南九千里夏至日中無景矣天極不動之處遠極星猶三度有餘

古者觀於斗杓而知十二月觀于日之南北而定冬夏觀於月之盈虧而定朔望觀於星周而知改歲一日萬分二十九萬五千三百五十分九十三秒而成朔一十五萬二千一百八十四分三十七秒半而爲一氣歷二十四氣凡三百六十五萬二千四百二十五分而爲一歲六十年爲一元而氣朔之分秒同二十元爲一部而氣朔之千分同二十部爲一遂而氣朔分數並同矣今推上元遂首甲子歲天正甲子冬至日在東壁四度八千三百七十八分下距萬曆甲午天正冬至凡二遂五部一十四元三十年

凡二十八宿角亢氐候兖州房心候豫州尾箕候幽州斗候江湖牛女候揚州虛危候青州室壁候并州奎婁胃候徐州昴畢候冀州觜參候益州井鬼候雍州柳星張候三河翼軫候荊州凡五星秦之疆候太白占狼弧吳楚候熒惑占



鳥衡燕齊候辰星占虛危宋鄭候歲星占房心  
晉候辰星占參罰凡中國在東南爲陽日歲星  
熒惑填星占於街南畢主之西北胡貉旃裘引  
弓之民爲陰月太白辰星占於街北昴主之  
朝雲喜晴暮雲喜雨 露布文露沈雄雷之音  
恪恪焉雌雷之音依依焉凡虹霓秋見則百穀  
用耗雷霆冬作則蟄蟲奮而人多疫癘

玄覽卷之二

豫章朱謀埠鬱儀甫撰

輿地篇

凡地形東西爲緯南北爲經山爲積德川爲積  
形高者爲生下者爲死丘陵爲牡谿谷爲牝山  
氣多男澤氣多女障氣多暗嵐氣多聾林氣多  
瘞木氣多偃岸下氣多瘡石氣多力險阻氣多  
癭暑氣多天寒氣多壽谷氣多痺丘氣多狂衍  
氣多仁陵氣多貪輕土多利重土多遲清水音  
小濁水音大湍水人輕遲水人重中土多聖人



堅土之人剛弱土之人肥壚土之人大沙土之人細息土之人美耗土之人醜皆象其氣皆應其類也凡土地有龜龍之體有麟鳳之貌有弓弩之勢有斗升之象有張舒之形有塞閉之容有隱真之安有累露之危有膏英之利有壅壅之害此十形者氣勢之始終陰陽之所極也計九州之別壤山陵之大川澤所注萊沮所生鳥獸所聚九百一十一萬八千二十有四頃磽塉不墾者千五百萬二千頃

天有九部八紀地有九州八柱九州之外有八寅八寅之外有八絃八絃之外有八極八極之外有八氣是出寒暑八極之雲是雨天下

東南者天地之奧藏其地寬柔而卑其土薄其水淺其生物也滋其財富其人剽而不重靡食而偷生其士懦弱而少剛竿之則服西北者天地之勁方雄尊而嚴其土高其水寒其生物也寡其財確其人毅而近愚食淡而輕生士沈厚而慧撓之不屈

山林之民毛而方其物毛皂川澤之民黑而津其物鱗橐丘陵之民專而長其物羽覈墳衍之



民皙而瘠其物介茨原隰之民豐肉而庠其物  
羸叢三尺以上爲糞三尺以下爲地分別五土  
視其高下高宜黍稷下宜稻麥丘陵阪險宜桑  
果焉

東南揚州其山會稽其澤具區其川三江其浸  
五湖其利金錫竹箭其民二男五女其畜鳥獸  
其穀稻正南荊州其山衡山其澤雲夢其川江  
漢其浸潁湛其利丹銀齒革其民一男二女其  
畜鳥獸其穀稻河南豫州其山華山其澤圃田  
其川滎雒其浸波澍其利林漆絲枲其民二男  
三女其畜六擾其穀五種正東青州其山沂山  
其澤望諸其川淮泗其浸沂沐其利蒲魚其民  
一男二女其畜雞狗其穀稻麥河東兖州其山  
岱其澤大野其川河沛其浸雷維其利蒲魚其  
民二男三女其畜六擾其穀四種正西雍州其  
山嶽山其澤弦蒲其川涇汭其浸渭洛其利玉  
石其民三男二女其畜牛馬其穀黍稷東北幽  
州其山醫無閭其澤獫狝養其川河沛其浸菑時  
其利魚鹽其民一男三女其畜四擾其穀三種  
河內冀州其山霍其澤陽紆其川漳其浸汾潞



其利松柏其民五男三女其畜牛羊其穀黍稷  
正北并州其山恒其澤昭餘初其川虜沱嘔夷  
其浸萊易其利布帛其民二男三女其畜五擾  
其穀五種

青徐角羽集寬舒遲人聲緩其泉鹹以酸荆揚  
角徵會氣漂輕人聲急其泉酸以苦梁州商徵  
接剛勇漂人聲騫其泉苦以辛兗豫宮徵合平  
靜有慮人聲端其泉甘以苦雍冀合商羽端駛  
烈人聲捷其泉辛以鹹

五粟之土淖而不剛而不穀其種無不宜其  
澤多魚其牧宜牛羊其民工巧其泉黃白其人  
夷垢寡疾而難老五沃之土乾而不斥湛而不  
澤其人堅勁寡有疥騷終無疥醒五位之土不  
壩不灰其泉青黑其人輕直省事少食五隱之  
土芬然若灰五壤之土芬然若澤五浮之土捍  
然如米五恣之土廩焉如塏五纏之土芬焉若  
糠五剽之土華然若芬以賑五沙之土粟焉如  
屑塵五壩之土累然如僕累五猶之土其狀  
如糞五弘之土狀如鼠肝五殖之土甚澤以疏  
離圻以臞壻五穀之土婁婁然不忍水旱五鳧



之土堅而不豁五桀之土甚鹹以苦

長淮界南北而別江河自淮以北爲北條凡水皆宗大河焉自淮以南爲南條凡水皆宗大江焉淝淮也渦潁也睢汴也洙泗也濟洛也漳汾也滹沱也灤潞也洮渭也皆以河命者也吳淞也錢唐也曹娥也劔浦也章貢也漢也湘也賀也左右也富良也皆以江命者也川莫大於江河天下中川百三十有五小川千二百五十有二水泉三億三萬三千五百一十九遐荒絕域者不與焉

岱宗之高四十里衡山四千一十丈華山五千仞恒山三千九百丈嵩山少室八百六十丈天台一萬八千丈羅浮三千丈青城三千六百丈黟山一千一百七十丈天目七千五百丈武夷五百仞崑崙一萬一千里

海水三歲而一周周則流波相薄而地動名山五百歲而一開開則金玉之精涌焉丹丘千年而一燒黃河千年而一清清則聖人出焉

白水宜玉黑水宜砥青水宜碧赤水宜丹黃水宜金清水宜龜汾水濛濁而宜麻濟水通和而



宜麥河中濁而宜菽雒水輕利而宜禾渭水  
多力而宜黍漢水重安而宜竹江水肥仁而宜  
稻濟水沉重而宜膠蜀江之水爽烈而宜淬刃  
劔鄜延有流脂之泉漳州有烏脚之谿江乘有  
半湯之泉敘州有半鹹半淡之井庭州霸水悉  
唐脂水皆透金鐵西域畔茶怯之水能消金石  
連州斟谿一日而十溢安寧潮泉一日而三蘸  
貴州漏沟一日而百盈

北荒有石湖焉其廣千里其水恒冰夏至前後  
六十日乃解南海有石塘焉其廣千里海舶入  
之則陷爰有火山長四十里其木不燼火鼠居  
之織其毛是爲火浣之布有積石焉其名瓊支  
其廣千里其高百二十仞東荒有柴都焉春夏  
出雹以敗五穀西方日官之外有金山焉其長  
十里其高千尺爰有金人處之名曰金犀其長  
五丈虞淵之所爰有瀕海廣五十里見黃金則  
涌起而逐之西北之海有汜林焉林木浮生廣  
三百里隨波上下  
地東西二萬八千里南北二萬六千里名山五  
千三百七十出水之山八千里受水者八千里



出銅之山四百六十七出鐵之山三千六百九十此禹蹟之所被也

崑侖東北地轉下三千六百里有八玄幽都方二十萬里地下有四柱焉柱廣十萬里有三千六百軸互相牽制之八極之廣東西二億三萬三千里南北二億二萬一千五百里

河源發星宿海滙爲二澤岐而爲九渡經于崑崙東至積石凡六千七百里夏漲而淤則其土爲膠秋之淤也爲黃滅仲秋而後爲白滅霜露既降其漲而淤也爲沙矣

潮以朔望之前三日而漸長朔望之後三日而極大春夏晝大秋冬夜大臨海望以前晝潮望已後夜潮東海望以前夜潮望已後晝潮南海上弦以前晝潮上弦已後夜潮凡晝潮自朔後迭差入於夜夜潮自朔後迭差入於晝卯酉之月諸潮獨盛于它月

崑侖之山爲地首武關之山爲地門荆山爲地雌大別之山爲地理岐山爲地乳汶山爲井絡桐栢之山爲地穴鳥鼠之山爲地幹地有四瀆八流河出崑崙崙江出岷山濟出王屋淮出桐栢



是謂四瀆渭出鳥鼠漢出蟠冢洛出熊耳涇出少室汝出燕泉泗出陪尾沔出月台沂出太山是謂八流

五臺之嶺峨眉之顛冬夏積雪雲中五原雁門之野唾出口而成冰六月必裘番禺之南真臘之域四時恒炎人不知有霜雪山東濟寧分水之閘北距東昌臨青地降九十尺南距徐州沽頭地降百十有六尺桂林之壤視長沙番禺高千丈

廣州羅浮之山蓬萊之所浮也廬州浮槎之山者閩之所別也杭州飛來之峰中天竺靈鷲之所分也紹興獨婦之山西蜀之所飛也新豐慶山露臺之所涌也

東方之域濱海傍水其民食魚而嗜鹽黑色而踈理其病多爲癰瘍其治也宜砭石西方金玉之域沙石之處天地之所收引也其民陵居而多風水土剛強其民不衣而褐薦華食而脂肥其病生於內其治也宜毒藥北方者天地閉藏之域其地高陵風寒冰冽其民野處而乳食其病善滿其治也宜灸炳南方者天地之所長養



也其地下水土弱霧露之所聚也其民嗜酸而食脯繳理而赤色其病攣痺其治也宜微鍼中臬者地平以濕天地所以生萬物也衆其民食雜而不勞其病多痿厥寒熱其治也宜導引而按蹻焉

玄覽卷之三

豫章朱謀埠鬱儀甫撰

古今篇

天皇十有三君地皇十有一君人皇九君是謂三皇其次五龍之紀一姓五君攝提之紀凡五十九姓合雒之紀凡三姓連通之紀凡六姓敘命之紀凡四姓是謂五帝

循蜚之紀凡廿二氏曰鉅靈氏句疆氏譙明氏涿光氏鈞陳氏黃神氏狇神氏犁靈氏大颯氏鬼颯氏奔茲氏泰逢氏冉相氏蓋盈氏大敦氏



雲陽氏巫常氏秦壹氏空桑氏神民氏猗帝氏  
次民氏

因提之紀凡十三氏曰辰放氏治世二百五十  
載蜀山氏凡六世寇傀氏凡六世渾沌氏凡七  
世東戶氏凡十七世皇覃氏凡七世啓統氏凡  
三世吉夷氏凡四世凡蘧氏凡一世豨韋氏四  
世有巢氏治三百載凡二世遂人氏治二百三  
十載凡四世庸成氏八世

禪通之紀凡十九氏史皇氏一世栢皇氏二十  
世中皇氏四世大庭氏五世栗陸氏五世昆  
十一世軒轅三世赫胥一世葛天四世尊盧五  
世祝融二世昊英九世有巢七世朱襄三世陰  
康二世無懷六世太昊伏羲一世治百六十四  
載女媧氏一世治百三十載炎帝神農氏八世  
五百二十載

黃帝百載少昊八十四載顓頊七十八載帝嚳  
七十載帝摯九載堯七十二載舜六十一載夏  
十七王并寒浞四百五十八載商廿八王六百  
四十五載周三十四王八百七十七載秦昭襄  
迄子嬰凡六君四十九載西漢十二帝并呂后



二百一十四載王莽十四載劉玄二載東漢十  
二帝一百九十六載蜀漢二帝四十三載魏吳  
分立一載西晉以後南北分治三百廿四載隋  
并天下二帝廿九載唐十九帝二百九十載五  
代五十二載宋十八帝三百二十載元十君八  
十八載

魏曹氏五君四十五年吳孫氏四君五十八年  
晉司馬氏十五君百五十五年宋劉氏七君五  
十九年齊蕭氏七君廿三年梁蕭氏四君五十  
五年陳氏五君三十二年後魏拓拔氏十四君  
百六十年東魏拓拔氏一君八年北齊高氏六  
君廿八年後梁蕭氏三君三十三年北周宇文  
氏五君廿五年隋楊氏三君三十七年

五代梁朱氏二君十七年後唐李氏四君十四  
年晉石氏二君十一年漢劉氏二君四年周郭  
氏三年柴氏二君六年遼自契丹建號十君二  
百一十年金完顏氏九君一百二十年

皇明太祖洪武始戊申三十一年建文帝四年  
成祖永樂廿二年仁宗洪熙一年宣宗宣德十  
年英宗正統十四年景帝景泰七年英宗天順



八年憲宗成化二十三年孝宗弘治十八年武宗正德十六年世宗嘉靖四十五年穆宗隆慶六年今上萬曆始癸酉

人皇分山川爲九區黃帝畫百里之國萬區以封諸侯舜分十二州禹定爲九州秦始皇分天下爲三十六郡益闢地南越置桂林南海象郡閩中又收匈奴河南地爲縣四十漢武帝置犍爲蒼海朔方酒泉武威牂牁越巂沈黎汶山武都張掖燉煌益州樂浪臨屯玄菟真番凡十七郡分天下爲十三州唐太宗并省爲十道唐玄宗分十五道宋仁宗分爲十八路元立中書省一行省十有一 皇明置兩京十三布政司爲府一百五十九爲州二百三十四爲縣一千二百十四爲羈縻之司三百一十八

伏羲紀官以龍神農以火黃帝以雲少昊以鳥顓頊始以民事命官堯立百揆四岳州牧侯伯舜立司空司徒后稷士共工虞秩宗典樂納言夏后氏置六卿其官百殷之制六大五官六府六工其屬二百八州八伯周制天子六卿曰冢宰司徒宗伯司馬司寇司空其屬三百六十秦



置丞相太尉御史大夫侍中黃門侍郎給事中  
散騎中常侍郎中令謁者尚書令僕射尚書丞  
御史監御史奉常衛尉中尉宗正太僕廷尉典  
客理粟內史太史令少府將作前後左右將軍  
五官左右中郎將詹事中庶子太子家令率更  
令衛率郡守丞尉漢文帝改奉常曰太常典客  
曰大鴻臚廷尉曰大理武帝置五經博士及鹽  
鐵之官改郎中令曰光祿勳中尉曰執金吾初  
置十三州郡刺史京兆尹成帝置尚書五人分  
五曹之事以大司馬大司空並丞相爲三公罷  
刺史置州牧王莽置郡國縣學官光武改常侍  
曹爲吏部曹主選舉桓帝置祕書監獻帝設都  
督魏置駙馬都尉度支尚書晉置國子祭酒後  
魏置尚書諸司主事令史又置祠部曹梁以中  
書舍人專掌詔誥北齊置尚書六曹員外郎各  
一人又設六曹廿四司隋設國子監司業唐高  
祖置大都督府太宗置史館修撰中宗置修文  
館學士經略節度使玄宗置十道按察使置翰  
林院設侍講置學士院肅宗置防禦團練使節  
度使度支轉運使內樞密使僖宗置都指揮使



宋太祖置諸州知州通判

皇明太祖高皇帝罷丞相令六部尚書分理庶務改行中書省爲承宣布政司置通政使司錦衣衛鎮撫司置殿閣學士六科給事中改御史臺爲都察院立詹事府 成祖設六曹清吏司選庶吉士就文淵閣進其學設貴州布政司

仁宗選方面官叅贊各邊軍務 宣宗始遣御

史清軍巡視倉庫各省專設巡撫 英宗設提

學憲臣 景帝設兩廣總督 憲宗始設鄖陽

撫治都御史

辰放氏摵木茹皮緇髮而鬪首有巢氏始構木爲巢結繩爲政遂人氏鑽木取火以熟食制嫁娶注物蟲鳥獸之名軒轅氏作乘車始有刀貨赫胥之民始理髮有巢之民始槿廬藿扉填塗茨翳以避禽獸之害伏羲制甲歷畫八卦民始網罟神農始稼穡興陶冶井竈辨百藥煮海爲鹽黃帝始教民蠶桑

黃帝井田夏禹定九州之賦令民五十而貢殷人七十畝而助周人百畝而徹秦孝公開阡陌任民力多寡得耕收其入秦始皇使黔首自實



田漢高帝始輕田租十五而稅一文帝除民田  
租景帝令三十而稅一民出筭賦歲十三錢章  
帝詔以布帛爲租靈帝稅天下田畝十錢魏武  
帝令收田租畝粟四升戶絹二匹綿二斤晉武  
帝置戶調之式男子占田七十畝歲輸絹三匹  
綿三斤晉成帝始度民田取十分之一率畝稅  
米三升後魏文帝行均田之法一夫露田四十  
畝婦人半之奴婢三十畝刺史以下各有公田  
齊周皆因之隋制民年五十免役收其庸唐高  
祖定租庸調法人給田百畝歲輸粟二石綾絹  
二丈綿二兩歲用民力二十日代宗稅青苗畝  
十五錢德宗作夏秋兩稅法人戶以見居定其  
籍戶米五斛錢七緡有奇五代漢隱帝斛加雀  
鼠耗米二升宋太祖除檢括民田之令以見田  
爲額神宗行青苗法令民自隱度粟麥羸縮先  
貸之錢穀成而收之高宗詔田產不注砧基籍  
者皆沒於官元世祖令每丁全科稅粟三石驅  
丁粟一石地稅畝粟三升半科戶丁稅粟如驅  
丁新收交叅之戶初年稅五斗六年乃入丁稅  
國朝太祖創賦役黃籍以百一十戶爲一里里



十甲履畝定科 英宗詔減江南田科

齊相管仲謹正鹽筴秦始皇帝收鹽鐵之利二十倍于古漢武帝置鹽官二十八郡鐵官四十郡唐有鹽池十八井六百四十江淮之鹽不與焉天寶中鹽斗十錢乾元初十倍之貞元中三十倍之宋制鹽斗五斤錢二百二十元制置鹽運之官額鹽食鹽餘鹽凡三等 國朝令商中鹽輸邊二百斤爲引二百引直銀一斤成化時五倍之嘉靖中九倍之

漢武帝初筭商車筭緡錢筭民舟車權酒沽令民產子三歲出口錢唐德宗初稅間架稅茶漆竹木十取其一唐文宗始權茶明宗稅田器稅麩徵諸郡丁口鹽錢周世宗稅牛革宋神宗鬻度僧道牒文徽宗初收經制錢金人初稅牛具宋高宗收諸路月椿錢

黃帝冕舜十二章服禹佩玉秦簡公初令吏帶劔趙武靈王始胡服騎射漢獻帝時王公士人服幅巾後周宇文護令百官執笏紗幘隋文帝定服色尚黃煬帝定品官服色三紫五朱六以下綠吏青庶人白商皂唐太宗制翼善冠烏紗



帽 國朝太祖禁胡服定文武品官服制文自  
鶴以下至黃鸝武自獅以下至犀皆九品

秦始皇令民納粟拜爵漢惠帝始舉孝弟力田  
武帝令舉孝廉秀才宣帝制射策甲乙科詔舉  
文學高第郡國各一人曾帝詔郡國舉明經詣  
太學受業歲滿課試拜官桓帝鬻關內侯以下  
官爵靈帝立三互選法婚姻家及兩州人不得  
交互爲官梁武帝置州望郡宗鄉豪專掌搜薦  
後魏崔亮奏立停年格隋文帝令工商不得仕  
進煬帝設進士科唐太宗御試進士賜及第臚  
傳增廣生員武后定銓注法以身言書判取人  
給選者告身令貢舉者彌封姓名考覆之玄宗  
始令禮部侍郎知貢舉始試詩賦雜文貼經爲  
三場宋太祖初殿試貢士賜進士第太宗定進  
士爲三甲仁宗詔進士與殿試者勿黜落英宗  
令禮部三歲一貢舉神宗始以經義試士詔宗  
室非袒免親者許應舉 國朝洪武中給太學  
生月廩制生員巾服宣德中定會試分南北卷  
取士景泰中增定天下鄉試士額數

遂人氏立傳教之臺伏羲作十言之教神農頌



時令黃帝作李法周公定謚法名諱漢高帝賜功臣丹書鐵契制章表奏駁爲四品命令稱勅詔讞疑獄漢文帝除肉刑武帝作沈命法以捕盜後魏文帝罷門房之誅陳制春夏勿斷死刑唐武后置銅匭受密奏唐肅宗詔寃滯者聽詣三司使及搗登聞鼓後周刪律令敕格爲刑統始令配流者刺面宋神宗詔百官坐罪免杖黥國朝洪武中給朝參文武官牙牌出入令百司用半印勘合行移

漢順帝詔舉武猛任將帥者唐武后始設武舉宋仁宗始置武學神宗始策武舉士

神農以石爲兵黃帝以玉爲兵蚩尤以銅鐵爲兵揮於作弓夷牟作矢湯築五庫藏五兵秦孝公以戰獲首功多寡授爵秦二世發閭左民戍邊漢惠帝令戍卒歲更武帝置八校尉五屬國宣帝募飲飛射士初置屯衛屯田後魏作府兵後周置十二丁兵隋置軍器監始募民爲驍果唐玄宗募兵宿衛募丁壯實邊昭宣帝文民面爲軍五代晉籍鄉兵國朝洪武中定五軍營衛所官軍景泰中立京營團操之法成化中立



十一團營京營之制

神農伊耆氏始蜡祭顓頊祀社稷虞舜類上帝  
禮六宗望祀山川徧祀羣神始禘祫商湯作五  
祀井竈門行中霤漢高帝祠五帝令民里社武  
帝定三歲一郊唐玄宗祀雨師雷師同壇

周制諸侯五年一朝漢高帝令天下朝歲首魏  
文帝以長至日受方國百寮賀唐高宗命內外  
命婦入謁玄宗名其生辰爲千秋節休假三日  
穆宗誕日令百寮進名參賀天下州府置宴

有虞氏養國老于上庠夏后氏仲春丁亥萬用  
入學漢高帝以太牢祠孔子于曲阜平帝追謚  
孔子褒成宣尼父王莽起辟雍光武起太學明  
帝臨辟雍行太射禮令郡國鄉飲後魏官孔子  
後爲崇聖大夫唐太宗罷周公祠始以孔子爲  
先聖顏回爲先師左丘明等廿二人從祀玄宗  
令孔門弟子從祀追謚孔子文宣王贈弟子公  
侯伯爵元世祖加孔子大成號元文宗加顏曾  
思孟爲四公 國朝洪武中易太學廟像以木  
主嘉靖中令天下學廟皆木主除爵號

葛天氏始歌陰康氏始舞朱襄作瑟伏羲作琴



塤簫女媧作笙竽黃帝作鐘磬鼓吹鐃角鞀鉦  
制律呂立樂師少昊作浮磬舜作崇牙禹作鼗  
桀作爛漫之樂紂作北里之舞周有四夷之樂  
穆王有木寓歌舞之伎秦蒙恬作箏漢田橫客  
作輓歌漢武帝立樂府作角觝魚龍曼延吞刀  
吐火之戲梁有高絙舞輪之伎唐高宗置梨園  
作坊玄宗置教坊倡優雜伎元人作傳奇

禹制五衰之服商高宗宅憂三年漢文帝令短  
喪爲三十六日漢成帝令博士弟子父母死予  
寧二年安帝初聽大臣二千石刺史行三年喪

唐太宗制嫂叔相爲小功服武后令父在爲母  
喪三年玄宗加母黨服肅宗服喪斷爲二十七  
日國朝洪武中制子爲父母庶子爲其母皆  
斬衰三年嫡子衆子爲庶母皆齊衰杖朞

周穆王始尚方士求神仙漢武帝尚巫蠱越祝  
哀帝時秦景傳佛經王莽作讖緯漢明帝遣使  
天竺求佛法桓帝親祠老子用郊天樂晉咸康  
元年石虎始聽民爲僧尼後魏太武立天師道  
場受方士符籙誅沙門毀佛象佛書魏正平初  
復建佛圖聽民出家宋文帝令沙門拜人主唐



太宗令僧道拜其父母武后令僧尼隸祠部睿宗度公主爲女道士宋真宗受天書徽宗給道士祿元世祖尊胡僧爲帝師

漢高帝以公主與匈奴和親晉惠帝時匈奴劉淵稱帝唐肅宗歲遺回紇絹二萬匹憲宗與吐蕃互市僖宗以宗女妻南詔宋太祖置廣州市舶司真宗納契丹歲幣蒙古制江南人爲十等國朝洪武中設四夷館選國子教習四方番夷翻譯文字

玄覽卷之四

豫章朱謀埠鬱儀甫著

靈異篇

天皇氏三舌鱗身地皇氏馬蹠人皇之身九章  
史皇四目伏羲蛇身神農氏牛首大眉三辰能  
言五日能行七朝而齒具黃帝孕二十月而生  
河目隆顙日角龍顏弱而能言十歲而改神農  
之政顙頊併幹十三而致太平帝嚳戴干十五  
而佐顙頊唐堯孕十四月而生鳥庭八眉十三  
而佐帝摯舜四瞳子禹孕十四月長頸鳥喙兩



耳參漏而虎鼻湯臂二肘文王四乳其長十尺  
老聃在孕七十二年足履八卦仲尼河目海口  
坐如蹲龍具四十九表

鮫壽百八十歲伊尹百三十彭祖八百太公望  
百五十二召公奭百九十漢樂官竇公百八十  
齊東宮得疾壽三百歲後魏羅結百二十猶官  
侍中趙逸二百歲梁顧思遠百二十張元始九  
十有七始生子年百十一六齋力過人唐李元  
爽百三十六太原于伯龍百二十八宋党翁百  
七十譙定百三十瓊州楊采卿百九十五其子  
百二十二南昌錢郎百七十

蒲衣八歲舜讓之以天下宰子五歲而佐禹周  
太子晉八歲而辯服師曠項橐七歲爲孔子師  
魯仲連十二折田巴之辯張堪六歲受易長安  
號曰聖童夏侯榮七歲日誦千言經目輒識王  
莽時勃海尹方年廿一六藝五經無不洞達射  
蜚蟲策無不知者隋劉炫左圓右方口誦目數  
耳行聽受五事同舉唐元嘉左圓右方目數群  
羊口誦經史兼成四十字詩足書五言絕句一  
時並就



神農識百藥之性一日遇七十毒神而化之黃  
帝得白澤遂通萬物之情堯受龜曆于越裳知  
開闢以來記錄之事禹受靈寶五符以役蛟龍  
水豹以鎖巫支祁于龜山之足

顓頊裔孫陸終娶女彔氏孕之三年一產六子  
曰樊曰惠連曰錢曰萊曰安曰季連宋衛率胡  
藩有子六十人後周驃騎李遷哲有男女六十  
九人杜子微有子百四十人國朝慶成王有子  
百人皆受爵祿

韓衆服菖蒲十二年舉體生毛日誦萬言趙佗

子服桂二十一年日行五百里力舉千觔移門  
子食五味六十年入水不濡入火不灼林子明  
服朮十一年身輕如飛耳長五寸楚文子服芣  
八年夜視有光陵陽子仲服遠志二十年有子  
廿七人覽書輒記任季子服茯苓十八年能彰  
能隱體有王光甘始服天門冬在人間三百年  
張子聲楊始建王叔才于世彥皆服金鹽酒壽  
三百余歲姚泓服松栢葉綠毛被體在人間二  
百余年永嘉朱孺子服枸杞根遂能飛昇成都  
劉無名服雄黃三十年黃光冒領輕舉得道此



皆服食所致也

人結胎受氣上應列宿值聖宿則聖值賢宿則賢值文宿則文值武宿則武以至貴賤貧富壽夭僊靈莫不各從其類

諸姜之性弘諸姚之性仁張王之性寬李趙之性慤劉范之性急羸偃之性雄呂尚性惰熊羣性黷姬黃性廣曹儉性福是故人之紹續三五世中必有肖其祖先之形者

精微篇

人有五藏六府九竅三百六十五節十二經脉十五絡脉六百六十五穴男子骨白女子骨黑男子頂骨八女子六男左右肋骨各十二女子各十四男子綴脊兩旁稜骨九竅女子平布六竅男子八歲而更齒二八天癸至七八肝氣衰而天癸竭女子七歲而更齒二七天癸至七七天癸竭而地道閉

心出神明肺出治節肝出謀慮膽出決斷膻中出喜樂脾胃出五味大腸出變化小腸出化物



腎出伎巧三焦出水道膀胱藏津液

肺氣通於鼻心氣通於舌肝氣通于目脾氣通於口腎氣通於耳五藏不和則七竅不通六府不和則留而爲癰心藏神肺藏氣肝藏血脾藏肉腎藏志神有餘則笑不足則悲氣有餘則喘咳上氣不足則息利少氣血有餘則怒不足則恐形有餘則脹涇不利不足則四支不用志有餘則泄不足則厥血并於陰氣并於陽則爲驚狂血并於陽氣并於陰乃爲臈中血并於上氣并於下心煩惋而善怒血并於下氣并於上亂而喜忘

五穀入胃五藏六府皆以受氣清者爲營濁者爲衛營在脉中衛在脉外衛氣行於陰陽各二十有五度分爲晝夜平旦陰盡而陽受氣日中而陽隴日入陽盡而陰受氣夜半而大會萬民皆卧名曰合陰壯者肌肉滑而氣道通營衛之行不失其常故晝精而夜瞑老者氣血衰而肌肉枯氣道澀故晝不精夜不瞑矣

陽氣盡則瞑陰氣盡則寤陰氣下積陽氣未盡兩氣相引則數欠陽氣和利而爲嚏陽氣虛徐



而爲唏寒氣客于胃而爲噫熱氣客于胃而爲  
涎心系急而氣道約則爲太息藏府搖而宗脉  
感則爲泣涕寒氣攻胃新故相亂則爲噦寒氣  
客于皮膚陰盛陽虛則爲振栗胃虛而筋脉懈  
惰則爲譫胃虛而宗脉不實故耳鳴人怒則氣  
上恐則氣下喜則氣緩悲則氣消寒則氣收炁  
則氣泄驚則氣亂勞則氣耗思則氣結

凡五藏小者苦于憂大者緩于事高者好矜汰  
下者好萎腰五藏皆堅者無病皆脆者易病皆  
端正者和利得人心皆懈傾者邪心而善盜

凡心高則善忘心下則易恐心堅則藏安而守  
固心脆則善病消痺心偏傾則操持不一肺小  
則少飲肺大則多飲肝大則苦膈中脾大則不  
能疾行腎高則苦背脊痛腎下則腰尻痛

血勇者怒而面赤脉勇者怒而面青骨勇者怒  
而面白神勇者怒而色不變飲酒之人肝氣微  
則面青心氣微則面赤手有茸者有毒者

凡人在孕一月而膏二月而肤三月而胎四月  
而肌五月而筋六月而骨七月而成八月而動  
九月而蹠十月而生其形也鼻先成而耳後其



生也男面內而女外

諸風掉眩屬於肝諸寒收引屬於腎諸氣臍鬱  
屬於肺諸濕腫滿屬於脾諸痛痒瘡屬於心諸  
厥固泄屬於下諸痿喘嘔屬於上諸熱瘡癩諸  
禁鼓慄如喪神守諸逆衝上躁狂肘腫疼酸驚  
駭皆屬於火諸脹反戾渾濁嘔吐暴注皆屬於  
熱諸痙項強皆屬於濕諸暴強直皆屬於風諸  
病清冷澄澈皆屬於寒

人多思則神散多念則心勞多笑則臟腑上翻  
多言則氣海虛脫多喜則旁光納客風多怒則  
腠理奔浮血多樂則心神邪蕩多愁則頭面黑  
枯多好則氣潰溢多惡則精爽奔騰多事則筋  
脉乾急多機則智慮沈迷心內澄則真人守其  
位氣內定則邪物去其身常欲寬泰自居恬淡  
自守則形神安靜災病不生矣

形與氣欲相任不相任則天皮與肉欲相果不  
相果則天血氣經絡勝形而壽不勝形則天形  
充膚緩者壽膚急者夭形充肉堅者壽脆而無  
分理者夭

東方之音在齒舌南方之音在唇舌西方之音



在喞舌北方之音在喉舌利於喉者澀于脣利  
于齒者澀于喞土俗之殊也豐腴者聲多在喉  
癯瘠者聲多在脣口利者聲多在脣舌情隱者  
聲多在齒喞氣體之異也乖誕者其聲流散順  
信者其聲循節鄙戾者其聲嘶醜寬柔者其聲  
溫好信氣中易義氣時舒和氣簡備勇氣壯直  
心術之辨也

合口通音之謂宮開口吐聲之謂商張牙涌唇  
之謂角齒合唇開之謂徵齒開唇聚之謂羽雄  
雄洪宮之音也鏘鏘倉倉商之音也喔喔確

確角之音也倚倚巖巖徵之音也詡詡吁吁羽  
之音也古者天子嘗以正月之旦命太史決八  
風聽都人之聲而豫爲其備宮歲善商有兵徵  
旱羽水角饑其出師也使太師吹律合音以知  
臧否宮師和商戰勝角軍擾徵將急羽兵弱

風角之占申子爲貪狼寅午爲廉貞亥卯爲陰  
賊巳酉爲寬大戌丑爲公正辰未爲奸邪甲乙  
爲本情丙丁爲合情戊巳爲刑情庚辛爲衝情  
壬癸爲鉤情貪狼作好廉貞作惡寬大作喜陰  
賊作怒公正作哀奸邪作樂是謂六情



持術之人有照影而知吉凶者有聽聲而知吉凶者有灸景而療疾者有撤病人席蓐藥之而瘥疾者有剖腹背抽割積聚者有能徙癰疽於樹木者有布灰耕刺而去鯁咽者



